

Senideak: «Gizartearen borondatea zein den argi erakutsiko diegu erakundeei»

Hainbat gizarte eragilek sakabanaketaren aurkako manifestaldira deitu dute

Juan Kruz Lakasta / Iruñea

Euskal presoek eskubideen aldeko eta sakabanaketaren aurkako manifestaldia egingen dute bihar Iruñean, Senideek deituta, eta hainbat gizarte eragilek sustengatuta. Protestaldia jai giroan egingen dute, isila izanen da, eta Nafarroako hiriburu Golem zinematokietatik abiatuko da, arratsaldeko 17:00etan.

SAKABANAKETAREN aurkako biharko manifestaldi deialdiari sustengua eman diote HB, IU, EA, Batzarre, EAJ eta PCE alderdi politikoek, LAB, ELA, ESK, EHNE, CGT eta EILAS sindikatuek eta beste hainbat gizarte taldek eta pertsona ezagunek. Esther Lakasta Senideak taldeko bozeramailearen arabera, protestaldia «mugarria» izanen da Nafarroako gizartearentzat. «Izan ere, presoek eskubideen alde egiteko jatorri ezberdineko hainbeste gizarte talde eta pertsona ezagun elkartzen garen lehendabiziko aldia izanen da, eta deialdiaren egileen izaera askotariko hori dela kausa, manifestaldia hagitz jendetsua izanen da», azaldu zuen Lakastak. «Manifestaldiak erakundeei Nafarroako gizartearen benetako borondatea zein den erakutsiko die», gaineratu zuen.

Lakastaren aburuz, erakundeei eta manifestaldi deialdiarekin bat egin ez duten alderdiek «ezin dute segitu aldarrikapen honi bizkarra ematen», eta «jarrera inmobilitetarik alden du eta hautesleek haien bizkar utzi duten ardurari eutsi behar diote, sakabanaketa bertan behera gera dadin». Izan ere, «Nafarroako Gobernuak gauza asko ditu esateko Espainiako zein Frantziako gobernuen aitzinean». Bestalde, Lakastak salatu zuen euskal gizarteak egun egoera itxaropentsua bizi badu ere, euskal presoak egoera gero eta latzagoan daudela. Horren erakusle, besteak beste, azaldu zuen Kepa Miner, Antxon Garcia del Molino eta Txotxe Andueza euskal presoek giltzaperaturik segitzen dutela, gaixotasun larri eta sendaezi-



Iruñean egingo duten manifestazioaren aurkezpenean hainbat taldetako ordezkariak bildu ziren atzo.

nak pairatzen badituzte ere. «Sakabanaketak presoek eskubideen urraketa eta presoek zein senideen sofrimendua eragiten du», salatu zuen Lakastak.

Lau puntuko agiria

Manifestaldi deialdia egiteko, senideek presoek eskubideen aldeko eta sakabanaketaren aurkako agiria prestatu dute,

eta horixe sinatu dute manifestaldi deialdiarekin bat egin duten gizarte eragileek. Idazkiak lau puntu dauzka. Lehenik eta behin, presoek kartzela zigorra haien jaioterritik gertuen dagoen espetxean betetzeko duten eskubidea aldarrikatzen du. Horren ondotik, idazkiak salatzen du sakabanaketa «neurri politiko» dela, eta «eskubideen urraketa, sofrimendua eta

gizartearen aztoratzea eragiten dituela». Hirugarren puntuak dio presoek sakabanaketaren amaierak eta haien eskubideekiko errespetuak ezin dutela egon egoera politikoaren gorabeheren menpe, «edozein egoeratan errespetatu beharreko eskubideak direlako». Bere azken puntuan, idazkiak biharko manifestaldian parte hartzeraz deitzen du.

Sustengu zerrenda luzea

■ SENIDEEK biharko manifestaldiari begira ehunka sustengu lortu dituzte Nafarroako gizarte eragileen artean. Sakabanaketaren aurkako agiria sinatu duten zerrendak zortzi folio hartzen ditu. Sei alderdi politikok eta zazpi sindikatuk egin dute bat presoek eskubideen aldeko ekimenarekin.

Horiez gain, hainbat gizarte taldek sustengatu dute protestaldia, besteak beste, Iruñeko hamar peñak, Ikastolen Elkartek, Sodepaz gobernu kanpoko erakundeak, Nafarroako Gaztediaren Kontseiluak, Elkarri eta Oinarriak euskararen normalizazioaren aldeko plataformak. Bestal-

de, 63 kazetarik sinatu dute agiria. Haien artean daude Mikel Muez, Ana Belasko, Ana Valencia, Javier Pagola eta Mikel Bujanda. Sinatzaileen artean badi-ra, halaber, abokatu asko. Zerrendan ageri dira Felipe Gurrutxaga, Juanje Soria, Patxi Zabaleta, Carlos Garaikoetxea Mina, Tomas Ur-

zainki. Hainbat kirolari ere sakabanaketaren aurkako jarrera azaldu dute, Ladis Galarza, Patxi Eugi eta Asier Olaiola pilotariak, besteak beste. Zerrendan artistarik ez da falta: Jon Gorriti eskultorea, Jose Luis Zumeta margolaria, Victor Moreno idazlea, eta beste asko.

Seaskak, EHEk eta Aiherrako ABk bat egin dute Baionako manifestaldiarekin

Erredakzioa / Baiona

DATORREN maiatzaren 15ean manifestaldia egingo da Baionan euskal presoek Euskal Herriratzea galdegiteko. Presoen Koordinaketak, Anai Arteak eta giza eskubideen hainbat taldek antolatuta *Euskal presoak Euskal Herrirat* leloarekin egingo dute manifestaldia arratsaldeko 15:00etan Baionan.

Manifestaldi hori atxikimendu ugari jasotzen ari da. Atzo Seaskako langileen elkarteak egin zuen manifestaldian parte hartzeko deia. Euskal Herrian Euskaraz taldeak ere bat egin du deialdiarekin. Euskal presoak sakabanaketaren ondorioz euskaldun gisa ere zigortzen dituztela zioen EHEren oharra. Gutunak euskaraz jasotzeko dituzten zailtasunak ere nabarmetzen zituzten, eta presoak Euskal Herrian izatea haien eskubidea dela oroitarazi.

Azkenik Aiherrako Abertzaleen Batasunak ere manifestaldian parte hartzeko deia egin zuen.

Gose greba hasiko dute gaur Barakaldon presoek alde

Europa Press / Barakaldo

BOST lagunek gose greba hasiko dute gaur Barakaldoko San Bizente elizan (Bizkaia) presoek egoera salatzearen asmoz. Gaurtik maiatzaren 14ra egingo dute gose greba eta egun horretan giza katea egingo dute amaiera gisa.

Presoen Euskal Herriratzea eta hiru laurdenak bete dituztenen askatzea eskatzeaz gain, laster zigorra betetzeko kartzelatuak dituzten bi gazteren egoera salatu asmo dute ekimen horrekin. Aipatu gazteek ere gose greban parte hartuko dute.